

**14 NGO Serah Surat Rayuan Minta PM Selesaikan Isu Air Di Kelantan
Bernama
5 Ogos, 2012**

KOTA BAHARU, 5 Ogos (Bernama) -- Majlis Tindakan Rakyat Kelantan (MTRK) dan Pertubuhan Pribumi Perkasa Malaysia (Perkasa), yang mewakili 14 pertubuhan bukan kerajaan (NGO) di Kelantan, hari ini menyerahkan surat rayuan kepada Perdana Menteri Datuk Seri Najib Tun Razak supaya menyelesaikan isu air yang berlarutan menimbulkan masalah kepada rakyat negeri ini.

Surat itu disampaikan oleh Yang Dipertua Perkasa Kelantan Mohd Fauzi Mohamad sejurus selepas Perdana Menteri selesai mengadakan pertemuan dengan pemimpin Barisan Nasional (BN) di Lapangan Terbang Sultan Ismail Petra, Pengkalan Chepa di sini, sempena lawatan kerjanya ke Kelantan.

Antara NGO berkenaan ialah Persatuan Guru Melayu Kelantan, Gerakan Tukar Kerajaan PAS Kelantan (Tukar); Persatuan Kereta Sewa Kelantan, Cuepacs Kelantan, Persatuan Pengakap Kelantan, dan St John Ambulans, Persatuan Bekas Polis dan Tentera Kelantan.

Mohd Fauzi berkata pihaknya menyerahkan surat itu hasil keputusan yang dicapai semua NGO itu pada Jumaat lepas.

Beliau berkata semua NGO itu memutuskan supaya merayu kepada Perdana Menteri agar meluluskan peruntukan persediaan sebanyak RM2.8 juta untuk digunakan bagi membeli air minuman apabila bekalan air terputus sehingga lima hari di sesetengah kawasan seperti yang dialami sekarang.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=685768>